



## SERVISIO METEOROLOGIKO DI ANTIANAN HULANDES I ARUBA

Seru Mahumaz/n KORSOU, Antianan Hulandes  
Tel: +399 9 839.3366 Fax: +399 9 868.3999

### ÒKTOBER 2008: UN LUNA MUHÁ

Opservashonnan ta indiká ku òktober 2008 tabata un luna hopi muhá riba Islanan ABC. Na Aruba, Boneiru i Kòrsou a kai, especialmente dor di presensha di tormenta tropikal *Omar* den bisindario, hopi awa.

A midi na Aeropuerto Reina Beatrix un total di 279.8 mm, loke ta un rekòrt nobo pa e stashòn aki den luna di òktober. Mayoria áwaseru a kai riba 14 i 15 di òktober, ora ku a midi algu mas ku 100 mm den 24 ora di tempu. E rekòrt bieu di 214.3 mm a ser establese na òktober 1990. E promedio di áwaseru pa òktober na aeropuerto di Aruba ta 65 mm.

Mas muhá ainda tabata durante di òktober 2008 na WEB na Balashi kaminda no ménos ku 396 mm a ser midí. Aki tambe e montante aki ta un rekòrt nobo. E rekòrt anterior a ser establese durante di òktober 1954 tempu ku orkan *Hazel* a pasa djis nort di Islanan ABC.

Boneiru tambe a partisipá na e "fiesta di áwaseru" aki i einan tambe presensha di *Omar* den serkania tabata responsabel pa mayoria áwaseru. Na Flamingo Airport a registrá un suma total di áwaseru di 196.2 mm. E promedio di áwaseru pa e stashòn aki ta 67.3 mm. Na kompania BOPEC durante di e mésun periodo a kai un kantidat di 265.6 mm. Tambe na otro partinan di Boneiru a kai hopi áwaseru i e kantidatnan di awa pa òktober 2008 tabata varia entre di 150 i 250 mm.

Kòrsou no por a keda atras i ei tambe òktober 2008 tabata un luna muhá, pero e total di 211.4 mm ku a midi na Aeropuerto Hato no ta un rekòrt nobo. Durante di òktober 1988 a kai ei no ménos ku 373.1 mm di áwaseru. E promedio di áwaseru pa òktober na Hato ta 83.7 mm. Datonan preliminar ta indiká ku durante di òktober 2008, mayoria áwaseru a kai na Bandabou. E lugánan mas muhá na Kòrsou tabata San Juan (301.1 mm) i Zumbu (278.5 mm). Na otro partinan di e isla aki a midi totalnan ku ta varia entre di 140 i 280 mm.

Sigun klimatologia, òktober riba Islanan ABC ta e luna den kua tin mas dia ku welek ku bos. E aña aki a tende bos zona riba por lo ménos 15 dia durante di òktober. Solamente na 1990 (23) i 1976 (17) tabatin mas dia ku welek ku bos den luna di òktober.

---